

eis, ut bene comederent, et caste viverent, quodammodo esse puto.

VII. Contra iram hodie apponitur medicina patientiæ, quia audivit Dominus in deserto: «Omnia tibi dabo, si » cadens adoraveris me<sup>1</sup>. » O quam perniciosam sunt hæc verba, fratres, ut creatura petat a Creatore adorari, quod ipsi soli Deo competit. Hoc ideo, fratres, attendite Salvatorem Pontificem nostrum hodie «Tentatum per omnia<sup>2</sup>;» nam nihil facilius frangit iram, quam aspicere Salvatoris nostri vitam, et mitigat (1) eum qui passus est injuriam, quam genuflexio: ipse enim actus genuflexionis est tantæ perfectionis, quod (2) non solum homines placat ad pietatem, sed etiam et leones ad lacrymas inducit. Naturalis quippe oculorum et genuum est quædam affinitas, quia, ut asserunt qui de naturis rerum agunt, pueri in utero matris oculis superpositis genua flexa sunt (3). Flexis vero genibus naturaliter oculi prorumpuntur ad lacrymas, tanquam collactaneis (4) suis naturali correspondentibus affectione. Attende etiam, quod adversus invidiam etiam paratam medicinam videmus. In fine enim missæ aspice capitis inclinationem et vocem diaconi vel sacerdotis dicentis: «Humiliate capita vestra Deo;» ac si dicatur nobis: Humiliate oculos corporis et mentis, ne videatis unde delectamini (5), vel ne tanquam invidi tristimini, unde pereatis.

VIII. Similiter et contra acediam medicinam habemus. Est enim acedia sæculi tristitia, quando damno (6) rerum vel molestia corporum sic afficimur, ut etiam tædeat nos orare vel legere; quod valde cavendum est, ne acedia inebriemur. Ipsa enim est desperationis soror propinquior,

<sup>1</sup> Matth. iv, 9. — <sup>2</sup> Hebr. iv, 15.

(1) Deest vox *mitigat* in cod., quam opinando addidimus. Credo hic aliquam intermediam deesse sententiam. — (2) Forte *ut... placet... inducat*. — (3) Sic corrigere conati sumus. Cod. absque sensu *puer in utero matris oculis superpositis genua dixerunt*. — (4) Cod. *collectaneis*. — (5) Id. *delectas*. — (6) Id. *damnum*.

pro qua fugienda ipsa mater Ecclesia rogat, et mandat ut jejunando eleemosynas faciamus, et cum hoc indulgentias Ecclesiarum sollicitè acquiramus (1), et acquisitis, Christum sequi et imitari optime mereamur.

IX. Orandum enim semper est, sicupimus exaudiri: est enim oratio avis velocissima, quæ etiam proprium cælum penetrat, et attingit, et volat usque ad pedes Domini, nec ab eo recedit quousque exaudita fuerit. Oremus ergo singuli, oremus et universi. Orare docere debetis pueros, filios et puellas, et quid orare, et quid in oratione petere debeant (2). Oremus et nos universi, ut mundati per abstinentiam jejuniorum digne accedamus ad mysterium Angelorum, ut tandem trahat nos ad consortium piorum (3) Jesus Christus Dominus noster. Amen.

---

## SERMO XXVIII.

### In Quadragesima III.

*Educitur hic sermo ex Bibl. Ædil., cod. x, de quo supra. Sequens, quem stampis non submittimus, quia jam in lucem emissus est, a Combesio tribuitur sancto Leoni, sed perperam, ut videtur, unde in editionem Quesnelli rejectus est. Sit iste post sermonem præcedentem cum numero in Quadragesima XI.*

### SYNOPSIS.

I. Omnia tempore quadragesimæ reviviscunt, quod debemus imitari. II. Christi exemplum non necessitate jejunantis. III. Iracundiæ et irati effigies. IV. Epilogus.

(1) Cod. *acquiras*, et prius *facias*. — (2) Id. *debet*. — (3) Id. *primorum*.

I. FRATRES charissimi, quadragesimam hodie advenisse concernimus, gaudeamus; hodie remissio peccatorum nobis appropinquavit, exultemus; hodie asperitatem et carnis macerationem incipimus, perseverantes lætemur. Sicut enim terra sæpe per annum scinditur, ut abundantius fructificet frugibus, sic et nostram carnem scindere sæpe debemus, ut cælestibus sit apta (1) seminibus: sicut enim redditum (2) uberiosem capit, qui frequentius vexando exercet campum, ita et majorem gratiam percipiet, qui exercet sui corporis campum frequentius jejunando. Ecce enim abstinentiæ tempore herba segetum reviviscit (3) in messem: arbores jam præparant se ad flores et fructus; vineæ jam germinare pubescunt, et omnia de inferioribus ad altiora se extendunt, omnia ad cælum prospiciunt, ut discamus eodem quoque (4) tempore reviviscere spem nostram. In posterum fides perdita reparatur (5); temporalis vita tota proficiat in æternam, et omne humanum genus ad altiora resurgat. Modo ferrum agricola gestans, sarmenta deputat vinearum; ita et nos sordes peccatorum deponere non differamus. Ecce enim, fratres, in isto tempore, in isto quadragesimali circulo, universæ hoc agunt creaturæ; agamus valenter et nos, ut composite et ornate, in sancto Pascha, Christo resuscitato digne occurrere mereamur. Modo, fratres, omnia sunt prægnantia, ut tunc reperiantur in fructu. Tunc enim contra naturæ speciem spina producit (6) rosam, calamus flagrat liliū, asperitatem (7) arida virgulta deponunt, et ita cuncta floribus adornantur, ut festivitatem Dei magni creatura atque festum Creatoris sui celebrare festinet. Igitur et nos, fratres, hoc eodem tempore, affligendo nos et mortificando vitia et peccata, producamus de spinis rosam, de peccatis justitiam, de severitate misericordiam, de avaritia largitatem, de luxuria castitatem, de

(1) Cod. *acta*. — (2) Id. *redditum*. — (3) Id. *revivisset*. — (4) Id. *eodemque*. — (5) Id. *reparatur*. — (6) Id. *produceret*. — (7) Id. *evidenter male suavitatem*.

inglue abstinētiā, de abundantia parcitatem, de negligentia velocitatem. Istæ enim sunt spinæ corporis nostri, quæ perforant animam, de quibus dicitur: «Spinæ et tribulos germinabit tibi terra<sup>1</sup>.» Germinabit enim terra nostra spinas luxuriæ et libidinis, quibus pungimur ultra modum. Germinat nobis tribulos, cum (1) divitiarum cupiditate nos cruciat; spina enim Christiano avaritiæ suæ radix est; spinæ enim visui pulchræ sunt satis, sed lædunt: his ergo nisi vigilando et orando curari (2) non possumus. Comburemus ergo has nequissimas spinas igne charitatis; quem tamen ignem habere non poterimus, nisi prius corpora jejuniis et abstinentia maceremus; sed si hæc fecerimus, vel has spinas comburemus, vel eas in rosas odoriferas convertemus. Producit enim libido jejunando castimoniam, superbia humilitatem, sobrietas parcitatem; isti enim sunt flores vitæ nostræ, qui suavem odorem Christo faciunt. Hanc igitur quadragesimam largitus est Dominus, ut hujus temporis spatio, in morem totius, concupiscamus virtutum germina, ut in die Paschæ fructum justitiæ proferamus.

II. Hoc autem quadragenario numero ipse Deus se exercuit, non ut profectum inde caperet, sed ut profectum salutis nobis ostenderet; nec tamen in illo erat macula peccati, quæ verteretur velut spina in rosam, quia ipse erat flos natus de spina, et «Virga de radice Jesse<sup>2</sup>.» Virga enim erat Maria nitida, subtilis, et virgo, quæ Christum, velut florem, integritate (3) sui corporis germinavit. Continuatis ergo quadraginta diebus et noctibus hoc non esuriens jejunium (4) Dominus procuravit; sed illum postea esurisse legimus. Quomodo ergo potest fieri, quod (5) tantorum dierum numero famem sitimque non senserit, et postea esurierit? Esuriebat enim plane, nec denegare possumus quod (6) esurierit. Esuriit enim, ut homo; esuriit, ut Deus

<sup>1</sup> Gen. III, 18. — <sup>2</sup> Isai. XI, 1.

(1) Cod. *tam*. — (2) Id. *curare*. — (3) Id. *integritatem... germinabit*. — (4) Id. *jejunia*. — (5) Id. *ut quod*. — (6) Cod. *quod non*.

non cibum hominum, sed salutem; nec escarum epulas concupivit, sed animarum desideravit cœlestium satietatem. Christi enim cibus est redemptio populorum; Christi cibus est paternæ voluntatis affectus. Unde ipse Deus ait: « Meus enim cibus est, ut faciam voluntatem Patris mei<sup>1</sup>. » Unde et nos esuriamus cibum, non utique terrenum, sed cœlestem. Ille enim corpus ad tempus nutrit, sed cœlestis animam reficit in æternum. Sed quoniam in multis, deficiente cibo corporali, deficit et spiritualis, ideo summe cavendum, ne propter jejunii asperitatem ad iram et conturbationem deveniamus, sicut cholericis sæpe accidisse meminimus.

III. Quanta sit, fratres, iracundiæ culpa pensemus, per quam mansuetudo amittitur, sapientia perditur, et (1) quid agendum sit, penitus ignoratur. Nec mirum, quia ira in sinu stulti requiescit; hæc est quæ veritatis lucem subtrahit, mentem hominum confundit, sanctitatem (2) vitæ amittit, justitiam puram relinquit. Hæc est quæ societatem dissipat, scandala incitat, omnem rationem ignorat; ideo necesse est, ut iracundus solus bestialiter vivat. Hæc est, per quam concordia rumpitur, lux veritatis perditur; a quibus splendor sancti Spiritus excluditur, confusionis tenebræ incurunt (3). Hæc est inferni mater, Paradisi noverca, civitatum combustio, balneum fatuorum, sapientum abusio, fratrum homicida, diaboli soror, Angelorum inimica, suspendium peccatorum, malorum laqueus. Quid enim ait iracundus? Nam iræ suæ stimulis (4) accensum cor palpitat, corpus tremit, lingua se balbutiendo impedit, fauces et facies ingravescunt, oculi ut sidera sanguinea (5) lucent; sic quidem clamorem format, sed quid loquatur, omnino ignorat, sed manus ad offensionem parat, totusque comburitur, furore et angustia plenus. Nec mirum, fratres,

<sup>1</sup> Joan. iv, 34.

(1) Cod. ut. — (2) Id. pravitatem. — (3) Id. tenebra incurrit. — (4) Id. stimulus. — (5) Id. sanguinem.

quoniam omnis sic iratus, potestatis alienæ factus est, et diaboli damnationi jam datus est.

IV. Quid ergo, fratres, jejunamus, si pro omni verbo modico turbamur? Totum namque quod facimus dissipamus, nisi nos ipsos moderantes ab omni ira et turbatione ablineamus. Tunc enim proderunt nobis nostra jejunia, si a vitiis ablineamus, et abstinendo sæpe etiam confiteamur. Nemo, fratres mei, expectet confiteri, sive pœnitere, quando jam peccare non potest. Non enim inquit Deus necessitate, sed proprii arbitrii voluntate (1) peccata confiteri; quo disponat ipse Deus corda vestra ad faciendum ea quæ placita sunt ei qui est benedictus in sæcula. Amen.

---

SERMO XXIX.

In Quadragesima IV.

*Egressus hic sermo ex Bibl. Ædil., cod. x, in Appendicem ponatur, ut ceteri ejusdem familiæ, post sermonem præcedentem, cum numero in Quadragesima XII.*

SYNOPSIS.

I. Vocandi ad cœnam pauperes, non divites. II. Solvitur objectum de Christo saturante quinque millia hominum, qui non omnes erant pauperes. III. Veri amici pauperes, non divites. IV. Mala malorum amicitia.

I. SANCTAM quadragesimam hodierna die, fratres, intrantes, Christi pauperes ad nostram mensam intrare et compellere non tardemus; ipsi enim sunt amici nostri cha-

(1) Cod. necessitatem... voluntatem.

rissimi, qui Deo repræsentare coguntur bona a nobis recepta. Totum enim quod damus, amittimus, nisi quod amore Christi corde largimur. Sed dicet quis: Numquid non (1) Christum ad nuptias et ad convivia legimus aliquando accessisse? numquid non etiam Lazarus semper Christo convivium faciebat? numquid non et Simon, qui leprosus dicebatur, licet postea curatus fuerit a Christo, convivium præparabat? numquid non et Zachæus, numquid non et Nicodemus, numquid non et multi alii? numquid ergo sequi non debemus caput? numquid non et isti sancti ex hoc reputati sunt? numquid non et Maria in convivio veniam impetravit? numquid non et Zacheus in convivio audire meruit: «Hodie huic domui a Deo salus facta est<sup>1</sup>?» O homo, hortor et deprecor te, et tuæ charitati supplico, ut istos imiteris, istos sequaris in cunctis; istos in omnibus imitari memento. Nam si Lazarus, vel quicumque alius, Christo convivium præparabat, pauperi præparabat. Nam tantæ paupertatis fuit, ut ubi caput reclinaret non haberet. Pauper ergo fuit, et forma paupertatis triginta tribus annis et amplius appellatus fuit. Fac ergo ut isti, et sufficit.

II. Quid ergo dicis, o Manichæe, qui asseris convivia non solum pauperibus, verum etiam divitibus bonum esse parare? Nam licet Christus ad convivia accesserit, non ut ventrem impleret accedebat, sed sicut doctus (2) piscator et venator peritus in eo loco retia tendit, ubi majorem multitudinem piscium decernit, ut ex multis aliqui saltem capiantur; sic et Magister et Dominus faciebat. Nam suæ prædicationis retia sæpe tendebat, ubi plures convenire sciebat, ut ex multis aliqui caperentur, videntes et audientes quod «Virtus de illo exibat et sanabat omnes<sup>2</sup>.» Ideo sæpe ad convivia vocatus, ire non renuit. Sed dicit ulterius

<sup>1</sup> Luc. xix, 9. — <sup>2</sup> Id. vi, 19.

(1) Deest *non* in cod. juxta morem post *numquid*, et sic deinceps. — (2) Cod. *doctor*.

Manichæus: Numquid Christus non quinque millia hominum satiavit? numquid et omnes isti pauperes erant? Absit, inquit Manichæus. Ergo Christus divites satiavit et pauperes; ergo licite et sine peccato possumus ita divites, sicut pauperes satiare. O Manichæe, fortassis verum est quod dicis, quod non omnes pauperes erant. Nam aliqui Christum ad desertum sociaverunt, cupientes videre miracula, ut divites et potentes; aliqui ut videntes dicerent: «In Beelzebub ista signa facit<sup>1</sup>,» ut principes sacerdotum; aliqui Christum sequebantur sanari cupientes, ut pauperes et illi qui infirmabantur. Omnes enim qui ibi tunc aderant pauperes erant, quia esurientes, et in deserto panem habere non poterant. Pane enim carere non est paupertas, sed magna miseria.

III. Dimittamus ergo divites, fratres, in mensa, et illos vocemus qui nos iterum invitare non poterunt<sup>2</sup>. Illos in amicos constituamus, qui nobis non deficient tempore necessitatis. Inter veros enim amicos amicitia oritur ex benevolentia. Non enim sunt fideles, quos munus copulat (1), non et gratia; nam cito deserunt, nisi sæpe acceperint. Tales sunt divites et potentes. Dilectio enim quæ munere conglutinatur, eodem disperso dissolvitur. Illa vera est amicitia, quæ nihil quærit ex rebus amici, nisi ut gratis amet amantem. Fere (2) enim amicitia durat, qua servitium quæritur, sed non persona. Ille veraciter amicitiam quærit, qui nihil egendo eam appetit (3). Nam amicitia ex inopia brevis est, sed pauperum amicitia pura et perpetua est.

IV. Amate ergo, o vos divites, pauperes, quorum amor in æternum manebit. Amicitia enim tantum in bonis tenenda est; nam (4) qui ea in malo utuntur, non sibi amici, at (5) inimici existunt. Concordiam malorum contrariam esse honorum non dubitamus; et sicut semper optandum

<sup>1</sup> Matth. xii, 24. — <sup>2</sup> Luc. xiv, 14.

(1) Cod. *quod munus copulatur*. — (2) *Fere* hic ponitur pro *vix*. — (3) Cod. *appetat*. — (4) *Id. non*. — (5) *Id. et*.

est, ut mali semper discordes sint, sic et optandum est, ut boni semper sint concordēs (1). Amicitiam enim honorum semper Deus conservare affectat et dissipare malorum. Sic facere debemus et nos, ut filii Dei vere simus. Impedire namque debemus, in quantum possumus, ne malus bono in aliquo conversetur in occulto, et malum cum malo, in quantum possumus, conversari non permitamus; nam ignis cum igne positus nihil aliud faciet, nisi quod de sui natura est; nunquam quiescet. Amemus ergo, fratres, et cum dilectione corrigamus, et ab invicem separemus malos. Simus « Anima una et cor unum<sup>1</sup> » in Deo, non quia multa corpora habeant tantum unam animam, ut Arianus ille hæreticus aliquando dixit, sed una voluntate in Deo pauperes diligentes, et eis subvenientes, mereamur in die resurrectionis peregrinum Dominum hospitari. Amen.

## SERMO XXX.

## In Quadragesima V.

*Hic sermo, qui extrahitur ex Bibl. Ædil., cod. x, fol. 12, pulcherrimis refertur sententiis et exemplis, nec dubitarem quin eum sancto Augustino tribuerem, nisi obstaret parva codicis auctoritas. Sit locus ejus in Appendice post sermonem præcedentem, cum numero in Quadragesima XIII.*

## SYNOPSIS.

I. In quadragesima cessandum a malo, ut bonum operemur.

<sup>1</sup> Act. iv, 31.

(1) Addidimus opinando secundum membrum hujus sententiæ, quod desideratur in cod.

II. Quadragesima dierum jejunium. III. Exeundum a vitiis. IV. Vitæ brevitatis attendenda. V. Nihil auferemus, nisi quæ data fuerint pauperibus. VI. Non superbiat, cui brevi erit moriendum. VII. Exempla Romanorum imperatorum. VIII. Exempla philosophorum. IX. Mors, pœnitentiæ magistra. X. Docet nos conculcare terrena, et adamare cœlestia. XI. Hortatio ad pœnitentiam cito peragendam.

I. FRATRES charissimi, sanctam quadragesimam hodierna die intrantes, quid per Apostolum nobis dicatur, aures mentis et corporis omni affectu aperire solerter debemus. Ait enim Vas electionis: « Ecce nunc tempus acceptabile, ecce nunc dies salutis<sup>1</sup>. » Attendite igitur, fratres, qui jacentes fuisitis in pulvere; vobis præcipitur exire, qui catenis peccatorum hactenus tenebamini. Audite, quod « Ecce nunc tempus acceptabile, ecce nunc dies salutis. » Ligati enim estis catenis deliciarum; surgite et convertimini ad Dominum, quia benignus est<sup>2</sup>, quia misericors est, quia placabilis est. Ecce ergo nunc tempus Deo acceptum, quia parata est medicina. Vultis scire, fratres mei, quæ sit hæc medicina? « Quiescite agere perverse, discite bene facere<sup>3</sup>; » hæc enim duo optime vobis sufficiunt. Qui ergo sanari cupit, has duas potationes omnino sumere festinet. Verus (1) enim medicus quadragesima dies nobis suo exemplo donavit, in quibus casti, humiles, sobrii, benigni, incipiamus (2) quiescere agere perverse, et discere bene facere, ne Ninive civitas subvertatur.

II. Constitutus igitur est numerus istorum dierum, ut jejunemus mente et corpore; sic enim jejunavit Elias quadragesima diebus, et montem Dei ascendit<sup>4</sup>; sic et Moyses, ut Legem Domini mereretur recipere<sup>5</sup>; sic et Salvator noster hunc eundem numerum consecravit<sup>6</sup>. Voluit enim ipse

<sup>1</sup> 1 Cor. vi, 2. — <sup>2</sup> Joël. ii, 13. — <sup>3</sup> Isaï. i, 16. — <sup>4</sup> Reg. xix, 8. — <sup>5</sup> Exod. xxiv, 18. — <sup>6</sup> Math. iv, 2.

(1) Cod. vetus. — (2) Id. in cunctis.